

車營叩答合編

車營百八答序

邇東向習弓矢置火器於不講至車營則九邊英銳罕有知之者惟滄淵馬將軍解其意因盡改諸式車爲偏廂定爲車營十二其用車在用火其用火在疊陣要在耦則互出奇則迭變循環往復其用無窮然遼吾土也其地寒暖燥溼原隰邱陵吾得悉備而敵聞我兵退入老寨則夷險不可知而我難猝入矣因與諸文武大吏議知則識之不知則相與探討發哨馬入其地習其山川部落經由水陸各要隘規其廣狹量地險夷酌日短長占風旁正圖而識之合百有八偕爲問以發諸文武

大吏思而參僚如定興鹿伯順歸安茅芷生忻州杜應
芳等所對俱深明大畧規畫足以制敵知其乘天時用
地利盡人事因敵制變必有我欲進而敵不能使之退
我欲退而敵不能使之進者嗚呼進如風雨動若雷霆
變幻萬端呼吸立應諸大吏雖胸中各有甲兵又難以
數珠盡其變也予以腐儒位諸將之上身任安危共圖
大計撞晚鐘而入幕以思諸大吏鞠躬盡瘁與予共矢
忠誠以圖恢復當別有會心見諸實事又不僅此答之
塞我責也漢有武侯唐有裴度當取其軼事而三復以
思

凱陽孫稚繩拜手題序

車營百八答卷一

古頊孫文正公編次

歸安

茅元義

忻州

杜應芳

定興

鹿善繼

參佐幕僚

前

孫謙

左

尤世威

中部總兵官

馬世龍

右

王世欽

後

趙率教

全著

全校

第一答

兵有奇有正有以奇爲正以正爲奇更有以奇爲奇相
機而動待時而行循環無端其妙難測衛青用武綱車
以立功必用步爲正用騎爲奇而又不拘於步騎之奇

正更有出正於正出奇於奇因時以盡其妙而變幻於車之內外者夫豈徒以車自守乎楊素所謂不用車營之意嫌懦將徒知以守自計也衛青大將立功何疑

第二答

七十五人先後於兵車一爲前拒一爲右角一爲左角戰則卒車相參如常山蛇然擊左則右應擊右則左應擊中則左右皆應或進或退卒不離車其氣蒸蒸無懈可擊運用一及於神

第三答

曹操始爲戰騎陷騎遊騎且云車徒常教以正騎隊常

教以奇是步爲正而馬爲奇乃騎隊出仗之時而步隊或掩兩傍或直當中道至有騎隊反爲正兵步隊反爲奇兵是又奇正相生矣曹瞞一時之雄也恐爲所誤

第四答

馬隆言地狹卽施木屋於車上且戰且前蓋車不戰必不能前不前必不成戰我旣施木屋於車可以蔽敵矢砲自然可前可戰益戰益前今如車一渡河右攜海澨左據山陬後軍屹立如山使敵望而生畏夫何憚而不戰何憚而不前也

第五答

兵必有左右而立營亦然或夾擊或奇伏古大將未有不以左右而勝者遼東山海相望險夷各易俱有形勝可憑誠能量敵而進或如劉裕之左右翼或如超石之却月營或兩翼在前以法淮陰或兩翼在後以法諸葛隨地而施因時而動左右三疊何不可行

第六答

曹操以百人而分攻守其法當以技藝精熟身輕足捷者分攻車其性情持重者分守車古今勢異先後理同酌其法而用之必無不得

第七答

裴行儉以糧車三百乘伏壯士誘突厥掠糧壯士突出殺獲敵人幾盡此詐爲糧車以誘敵人也今果用其法不但可以殺獲敵人卽我糧車入敵敵將望而却顧是誠事半功倍之謀如敵料我爲詐而以兵雜糧中使敵見糧而不見兵其法更密

第八答

李靖討突厥越數千里營制不改有跳蕩騎兵有戰鋒隊步騎相半有駐隊兼車乘而出今車營之奇正盡之然必量敵兵之多寡敵勢之強弱敵情之離合敵地之險夷然後用則善

第九答

馬燧爲戰車行以爲載止以爲陣其討田悅乃以火車焚悅將楊朝先棚破之其用蓋以車載硝磺麻油等火具乘晦冥風沙之際潛至其棚以焚之况我有火車素習五火之用敵豈不可火攻

第十答

魏勝以戰車列營外砲車列營中而列弓車於陣門前突後冲弓車似乎有礙不知營中安砲車以爲骨四隅營中俱可以發砲車豈獨有礙弓車戰車各有弓矢隨在可用戰車豈反有礙弓車是用砲用弓之際或分或

合各有號令並行不悖魏勝夜習以軍機密事不令人知也何弓車不可當陣門

第十一答

車行當寬坦道路或先數十里或後數十里皆有往來彼此探報遇急先發遊騎或出敵前或繞敵後或設伏以掩擊敵之左右或設疑陣使其卻而不前登時可以成營而免相失以俟援軍

第十二答

車行當仄狹道路在水岸必先據其渡口以截上游在山岩必先搜其伏兵以據要路敵在我前用前軍以拒之

敵在我後用後軍以防之又隨撥遊兵從間道繞出敵後水則見渡而過山則猿攀而下敵人見卽駭如天降此時我軍從容過險營陣立成

第十三答

車正行有敵迎頭衝來其勢瀾漫料其先驅老弱不相干者以費我矢石卽分兩翼左右埋伏掩擊後路而正營嚴軍固守閉營不出俟敵精銳繼至然後我軍奮力攻殺騎步連環進如風雨左擊右掩使其不知所從倘敵之精銳一敗彼雖衆如無人矣否則應更出奇謀

第十四答

車正行我縱直有餘而敵橫擊之張兩翼以抄我旁我橫擺有餘而敵直擊之伏兩翼以要我脇法當偵探確實先據要害阻敵不前臨時直則用中軍以援前後橫則用左右以護中軍首尾相應彼此互援更出奇兵分兩股一搗敵老巢一要敵歸路計當不外此

第十五答

車正行遇泥淖可陷人馬正在躊躇忽有敵兵當卽整營嚴軍固守出奇分兩翼或擊其左或擊其右或抄襲其後敵必卻顧而我軍鼓譟而出直撲敵營俾敵四面受驚狂奔敗走而我軍整頓過險泥淖可保無虞或先

探敵來路拒之不前更妙

第十六答

車正行遇有大水又無舟楫方在整頓過渡敵或從旁截我於此岸又或乘我半渡截我於彼岸彼此兩岸當先探實敵之來路伏所遣精騎數千遙設疑陣以牽其勢此岸之敵我兵未渡可留一軍以截之彼岸之敵我軍方渡卽整一軍以待之而先遣精騎數千遇敵於此岸則沿岸直襲其後遇敵於彼岸卽偷渡以掩其旁我車未渡抱河爲營我軍半渡趕緊沿河列守庶幾可以迎敵

第十七答

車正行遇有叢林茂草伏火驟發我兵驚亂敵乃乘急來攻此敵乘風燥物乾之際用火攻計也我當嚴守勿驚敵來急攻亦勿與戰先相風南北所向迎風以除草木而斷其火復順風以燃草木而展其地火斷則延燒不及地展則人馬可移此臨時遇急之謀若預於伏火之處發遊騎暗中往來偵探遇敵輒捕見火卽撲更出奇以阨敵往來要口更不至臨時大費躊躇抑抄出敵後亦以火攻更爲奇中之奇

第十八答

車正行遇有流沙可陷人馬大風復作人馬俱困忽有伏敵法當預先巡沙左右探有伏敵發兵急剿卽或臨時伏起復遇風作人馬眯目號令不聞卽當極力整軍連營固守堅壁不出敵至則伏努短兵相接敵去則俟風稍歇卽撥輕車健馬旁出掩擊敵必大駭而遁我軍如履坦途

第十九答

車正行遇有大木橫攔隘口散置要路令我挪移不動敵來衝突當先偵探確實用囊沙運石之智將木陷臨時一猝墊平車無不過倘敵恃險衝突正得奮擊以獲

其利敵必驚潰而逃

第二十答

車薄敵巢敵堅城固守我從車中出奇拔其外城而內城更堅欲悉衆力攻而內無車營爲護外之車營又無人爲守勢當外營留兵爲守多設旗幟以壯軍威而巷戰之兵或金帛誘敵作細爲應或招募壯士致死攻城或驅擄脅敵人以爲前軍或燒經過敵房以挫敵氣急用高麗牌夾以鎗砲弓箭登時追進雲梯直豎立奪其旗內城雖堅必無不破

第二十一答

車臨敵安營已定敵卻堅不來犯至數十日我兵勢難
久待計必分兵攻其所必救以要其出乘機可以進攻
否則探其援兵多少偵其糧草有無察其勢之虛實量
其將之愚智斷其糧道誘其畔兵燒其房閭離其將佐
或返旆示以歸志倡造我軍疲乏將言百計誘之敵必
猝出我軍至是可以有爲

第二十二答

車未成陣敵驟來衝我一堵牆馬兵勢難萬全宜先分
數隊遊兵掠敵前後左牽右制使敵難前或探敵來路
設伏以要我軍可以萬全立成其陣

第二十三答

車臨敵城敵堅守不出欲作長圍作偏攻敵之矢石反能下及當先驅擄敵人費其矢石料矢石將盡更用聲東擊西之法乘虛而擊不啻空城

第二十四答

車臨敵地敵城守不動卻從旁從後有兵來犯我方整兵迎敵城中忽大譟出攻計當預搜其伏或探明先隨其來犯之路外敵必除外敵除內敵亦不敢出如猶有敵來犯及城內譟而出攻我以前鋒應內敵以後勁應外敵以中軍守老營策應前後而又別選奇兵數百繞

襲敵營乘虛以攻其城城必易拔否則相機再出計畧以議攻取

第二十五答

車臨敵巢百計誘敵不出我纔動敵卻尾我後我一回敵又佯敗突有伏兵此詭敵難以計勝也法云虛者實之此當築圍作守困之勢無輕與戰其計不磨自消而察其所必救之處選將潛師夜襲敵必惶恐出兵援救我以一師尾敵後阻其回路且以遙助夜襲之威此則合軍或偏攻或合擊大兵直抵城下至是看敵作何計畧相機而行

第二十六答

車正行前方遇敵後有數車或陷或脫舍之不肯顧之
不暇卽令此脫陷數車騎隊回環踐踏曳柴揚塵令敵
難見迨車旣整頓速進以合前車至是而營可以成

第二十七答

車過山險馬兵先行恐敵衝突難當車先行又恐不能
立時成營且探有伏兵欲起夫伏兵必在山險前後左
右幽暗之處如遇此險當先訪問土民堵截敵之來路
使伏不得驟發車行仍照常式魚貫而進過一車卽成
一車式過一衝卽成一衝式車盡過卽車營成矣如料

伏敵難制當徐議進止以出奇兵

第二十八答

車隔敵各爲固守而我饑敵飽計欲先發襲敵勢又不能法有五間之用當設計行間使敵不能不戰敵出我軍久欲邀戰必如鷹之逐兔獺之驅魚言勇直前敵鋒必挫况遼人之餉我者日至京東屯積俱可暫支而我隨營輜重可供十日煖炒可供十日駝隻可供十日種種計算原可不窮又况軍行在外需餉孔殷轉輸豈有不陸續而到者乎以是而計糧不必患敵可設法而誘以盡攻取之機

第二十九答

敵去城數里爲壘伏勇其中使輕卒戰而佯敗誘我薄城發伏令我前後受敵而又引別兵以疾擊我後此我必敗之勢也知者遇此必先搜其伏擊殺幾盡探明別路有無敵人分兵擊退乘勝進薄其城如我兵力已疲少休出奇再進豈以輕卒佯敗而遽爲敵算乎知者必不出此

第三十答

車營初定兵丁或相喧囂且有火砲震驚滿營欲動此內奸也當卽傳令妄動失次者斬罪以遞加於喧囂震

驚之處密訪嚴查見有疑惑之端卽時問明軍前正法以除內奸內奸去而全營肅靖敵雖外作策應自可出以從容

第三十一答

戰車以衛輜車地方險仄止容戰車又恐輜車難以自守爲敵所邀當出李靖擊突厥計料敵邀我輜車之處或前或後伏壯士於輜車以當其衝敵至而壯士出直前奮擊敵必大創而潰營陣何不可立防固何不可嚴

第三十二答

先趨戰地者迺後趨戰地者勞車一渡敵先趨戰地而

敵逸我先趨戰地而我逸乃我先趨戰地而逸敵不出
以老我師是我逸而又更甚於勞此時當出奇謀令敵
不得不出以嘗我精銳初至之師庶幾我兵不勞並可
勞敵兵也法在迫敵誘敵兩術盡之

第三十三答

車臨敵地多下淫霖雨數至沉灌堪虞草穢叢生延燒
爲慮是當挑濠引水下注除草防火延燒兩計如果難
行斯爲地形不利不可久師也法云好高而惡下貴陽
而賤陰蓋先鑒於是焉

第三十四答

車薄敵城敵乃左山右水重壘強弓退如山移進如風
雨此強敵也擊強之法當驕其將玩其兵使敵輕我以
洩其氣然後出六營精銳連環而進又於山水可通之
處設疑布隊以亂敵心更設內奸使敵自潰倘虞我兵
不克大軍暗地退兵休息留輕卒分五隊往來挑戰令
其晝夜不安俟敵人馬疲乏我軍奮氣復作再爲出奇
制勝以謀進攻

第三十五答

車行以六營爲一股而一股之中有分合有照顧臨機
應援之際鎗砲遠近相及而不相妨以及騎步出車本

營虛而仍實擺設分發之法要在號令嚴明臨機制變彼此可以應援此非素練之師驟難及此聞亂而法不亂一何其神

第三十六答

車臨水便可拆轅爲橋爲船而人馬旣渡輪采台車敵忽來犯或從上流以船筏截我此當用鐵索繫於上流效古橫江之法以截敵船且軍旣渡隨渡隨可成車豈旣渡而車營尙未卽成如恐敵來犯勢出倉猝車難驟合又當未渡之先探有敵否有則或出奇以阻其來犯事更萬全不至臨時忙亂

第三十七答

車臨山阜不問山之左右前獲我動靜敵俱得而見之欲移而又恐其乘我值此或壅截旁出之路使敵難進我兵直冲而下或潛度旁出之路使敵驚潰我軍緩轡而行否則插旗於山阜燃火起烟勢似卻顧不前先造飯以餉軍士使敵不知爲假而我軍掩旗鼓以暗過此山車營亦可立成敵覺亦咋舌而無如何也

第三十八答

軍行以偵探爲要十二車營分兩路渡河道有遠近地有險夷必先探明酌量時日先後定期一齊並渡分必

可以獨應合亦不至後時十二車營方可齊一道途縱有遲悞而偵探往復登岸時日豈或難齊

第三十九答

金蓋國初葉馬二將軍用以取遼東者也車一渡或據其城以爲家或徐觀其變而後動遲速之故因敵而施有隱可乘兵貴神速否則徐觀其變亦老成持重之謀

第四十答

車營海蓋而耀州當其中於此設營收遼人強者可以佐我借助軍威何器不可以執弱者使其沿關屯田給籽種各安其業而強者之中如有技藝超常奮勇出衆

者拔尤分隸各營使之効力安輯自不待言

第四十一答

車營薄敵陷番諸領兵者或跳身獨來或相率以歸或領衆投順以敵攻敵此機不可失也當收之營中或別置其衆於營外於陷番諸領兵者悉優禮以待參之以謀而觀其智期之以事而探其誠醉之以酒而察其性伺無他變復固結之感激之然後用以觀其效至其投順衆番先使分隸各營不至相聚爲患勿久置別地反不得其死力也

第四十二答

車營登岸老少遼人來歸安插何地如以船西渡兵方圖東其勢不順如盡插四衛須兵以防其力難支莫若按其原籍使歸本地復業或有爲敵所據不能回籍者安插沿河一帶給籽種牛糧開屯墾爲活計以安流民

第四十三答

車營旣渡而車遲騎速騎路道遠而不盡熟常用土民嚮導量途遠近訂期俾車騎一時並到即可合營以得其利不至有返顧相望之虞

第四十四答

車營抵海蓋當借遼糧食遼人新附者而敵之糧多在

開鐵如欲因糧必用新附遼人點慧有膽畧者數十人
山開鐵附近一帶設法購運立局收存或有來歸短髮
遼人能通敵語與敵有識者轉相勾結因出奇兵以劫
之更妙是在相機而行

第四十五答

車一股分六營其分而相應合而相聯惟大將能主之
而勢相懸隔敵在呼吸之間立得應援立得分合每營
各設迅健探報臨時分合援應片刻自可立達

第四十六答

車營馬步戰輜相爲比合但兩將分統步騎而應步而

步應騎而騎豈呼立應其勢甚捷有營將所見所不見者臨時不相推諉此必別有號令使兩將俱得而識其實專在十二材官

第四十七答

車行東北而錦義有伏敵或西虜邀我輜重車臨覺島方至彼岸而水有敵舟如納哈之從長廣反攻者當預留兩營在後爲勁以防敵伏而西虜顧愕輜重必不敢邀我臨覺島至岸而水有敵舟又先發一軍潛伏彼岸近舟掩擊敵怯可保無虞

第四十八答

車入敵境敵忽傾寨奔回舊巢我兵入據其城而內無糧草可因敵乃復從舊巢而出以攻以圍此以空城困我也斷不可冒入當嚴軍以待探明敵之去路有險先分軍以據之使其不得回攻然後進城以圖攻取否則遲以觀其變使敵計無從而施

第四十九答

車入敵境徒得空城敵乃入山險叢箐中我軍既難深入糧又不可久待稍議還兵而敵又據城我復至而敵仍退此詭敵疲我師以肆其志也計當先籌糧餉養軍秣馬以張進攻之勢乘敵未來分兵進據山險探有別

道繞出敵後分兵掩擊使敵前後失顧相機一鼓就擒
如我糧難繼更當另出奇謀

第五十答

車旣攻而殺敵餘孽尙存勢當殄滅大兵據城去蓋旣
遠糧恐不繼捷聞糧當兼程前進况敵旣殺其大半敵
糧自有可因而陷敵遼民復見天日更有以壺漿箪食
來迎者是亦糧餉之一助焉

第五十一答

車旣臨敵人可因兵地可因糧而奪遼人之糧遼且爲
亂以抗王師卽未敢抗而遼糧旣盡遼人亦無以爲食

勢所必至然我兵爲遼千里除害遼人必當多方採辦米石以餉我師又豈以久出而不緊爲催運者且遼人老弱俱可屯田貿易是富饒之象不出半載勢且物阜民豐

第五十二答

車營下定時中有奸細當兩相交鋒之際營中忽有變動守兵忙亂戰兵驚慌此爲內變當嚴飭該營將佐約束隊伍各自整頓互相稽查變動之處查有奸細即可拏問懲以極法以昭鎮定而內外各巡風警察巡邏時刻不懈我兵自可盡力衝鋒

第五十三答

車營既立議暗襲敵巢而地有險易道有遠近兵有馬步將有鈍敏且古人刼寨之馬必選迅快不鳴嘶者是必就其易取其近酌量兵之多少選馬之迅快不鳴者啣枚疾走而以敏將領之付以暗號乘隙奮擊相識無得相言更有就險道以行刼者是又出其不意攻其不備更奇

第五十四答

車營既定敵於晝日寂然不動却於黑夜刼營或從別路擊我後而敵不數十人使我全營忙亂不得休息欲

靜以待之又恐敵多猝至此當於我營四面無論險易
遠近有路可通敵營者挑捷健兵勇各派三五十名帶
繩樁於各路口暗伏以蹶敵馬或掘坑坎以陷之卽用
短兵直前相擊後敵必且驚愕不前如敵兵多猝至偵
探急回告警我好出兵相機而行

車營百八答卷上終

車營百八答卷二

古項孫文正公編次

參佐幕僚

歸安
折州
定興
茅元儀
杜應芳
鹿善繼

全著

總兵

前
左
中
右
後
孫
尤
馬
王
趙
諫
世
世
世
欽
率
教

全校

第五十五答

車分幾路敵祇專攻一路我各路未集其一路立定手
脚便可鼓舞大衆少有差錯衆心卽以駭懼此以一路

壯各路之威卽以壯天下之威關係誠非小也爲大將者必當振其威武鼓舞衆心用天時盡地利知己知彼運用極平無窮如敵多利在日暮相擊預伏兩翼於左右勝則收兩翼以裹敵否則張兩翼以分敵而正兵列三層以直衝敵中軍又引精騎抄敵後或趁晦冥或乘烟霧出奇以撓其中軍中軍怯而餘敵不足破矣如敵寡則非以輕兵挑我卽以驍騎擊我我當小戰佯北以撓其氣繼覆以大軍使敵駭遁而其計不行強或避其前鋒嚴軍勿戰弱或防其後勁固守勿迎而暗置毒物香料於水草之交潛伏灰瓶梅井於要衝之路撥一軍

以誘之誘至乘其困憊可相機而行然猶恐其虛實未知也察其實我姑避之深固其溝壘據險要出奇以制之察其虛我且擊之環攻暗襲出騎步合力以剿之如是以馭敵敵之多寡強弱虛實悉入吾算中無在不可以制勝矣法曰先聲奪人大將當念之

第五十六答

車臨敵尙未交鋒忽報西北有西虜助敵勢甚凶惡乘未交鋒分左右兩軍各半作前敵分前後兩軍各半作後應中軍出十分之二作督軍以挽西虜更於西北面多設疑陣於要隘使不敢前而東南軍營仍如不動以

待敵衝敵見我鎮定如常亦必不敢來犯

第五十七答

車營下定忽違人之爲敵兵者來投或西虜報來助順我方翹望爲快而原是敵兵到卽爲亂夫敵人來投必拋兵解甲以示其誠不然則其詐立見且彼旣來投必有不得於敵之故先令其殺敵以立功功立然後議至西虜報來助順先留其來報之人使使往西虜陽似慰勞者而暗用通虜語之人假虜衣帽探聽其消息詭言以詰之否則由別路用敵人之鎧仗驅牛馬以犒其師彼受犒卽可辨真僞矣我於此卽爲之防

第五十八答

車營各路抵境敵方隨路擺設於彼岸欲渡則難登相持則難待此當有擄空攻虛之策用木牌寫克敵登岸之日置上流沿岸而下使敵見而驚懈乘其未備之處或因水狹浪高乘船搶渡搖旗鳴鼓沿岸直撲敵營敵必解散否則潛師以擄其巢使敵不知而仍與我隔河相拒此更爲奇中之奇

第五十九答

車營一處交鋒而敵效我別路之衣帽混我於倉猝使我誤認如米之西兵者預飭各將於出軍之先於旗幟

衣帽各添暗記有定形無定日如虫魚鳥獸之物方圓
曲直之儀周而復始我知而敵不知其誤自免

第六十答

蓋套等地爲赴海蓋捷徑近祇十餘里遠纔四五十里
倘敵加兵於海蓋兵一渡則後背水而前臨堅城勁敵
當急撥輕車從別道或出其旁或抄其後分兩軍以爲
援應正軍迎敵前後列爲三營又分兩營於左右遙與
輕車爲犄角之勢近則夾擊掩襲乘虛以搗其巢復多
設疑陣使遊騎紛紛擾擾往來海蓋以亂敵人之心勝
則攻城不勝卽合軍背水爲營俟便出奇攻取

第六十一答

車臨敵地敵或料我經行之地置毒水草又或投順之民簞壺亦有毒物先令犬豕試驗或用以先餉投順之民自不辨而知

第六十二答

大兵深入敵境短髮遼人必當辨別使之投順當以遼人之爲我兵者亦短其髮效敵衣帽入敵尋其故舊俾曉以義理動以利名勸之投順未有不從者否則造言使敵疑其歸我令彼懷疑不能自安且使遼人數十人俱短髮效敵衣帽時擾敵營彼必歸順無疑矣我當優

禮以固結其心

第六十三答

車臨蓋州金復在我之後東江之於金州登鎮之於復州必當遙爲聲勢始助軍威而金復去東江登鎮甚遠此當用短髮遼人選遼將素有威望者統帶以實二鎮而犒毛文龍於東江以復四衛檄萬有孚於登鎮進據廣鹿島聯絡其勢平島素非侵畔齎金帛馳一介以通問亦可遙爲聲勢以借鎮二州

第六十四答

甯遠以西五城七十二堡悉爲哈喇慎諸部所據聲言

助邊而其實未必如約然開鐵之民與西虜不睦遣使陽與西虜尋盟而陰結開鐵之民潛居其要害我卽出奇兵與開鐵之民爲應西虜雖黠欲驀其幕何難

第六十五答

車薄城逼而圍之開一角以待其奔而伏精兵以擊之此法甚是然敵大創則百年之利敵小創則十年之利我千里出師勞費鉅萬豈可聽其逸去乎是必待其奔伏精兵而盡殲之

第六十六答

敵無故自開一角勢欲奔出我方併力合備於此而敵

卻奔出於彼宜察敵情勢彼於何方便其奔突卽在何方防備且敵旣設計開此一角以冀他向而奔其旌旗人馬必偏集於其處有探頭縮尾時出而瞭望者我用樓車望而卽知

第六十七答

車方深入敵境寂然不見一人正在秣馬勵兵敵乃出奇合攻一營一營或力歎此當用常山之勢敵至則此營嚴軍固守而左右兩營首尾相應如未見敗而退敵必有伏姑俟以觀其變不可卽追

第六十八答

車行平坦則分五方而近中軍矣如遇山川險阻勢當分布法曰斂左右二軍而前後如故夫左右之斂當隨地爲之或盡置之後或右爲前之後左爲後之前平時作何訓練臨時自然不令而行

第六十九答

車入敵境地形順逆叢林厚薄我人未必盡悉也而衆車分行地各險易法曰利則進不利則止夫大兵行進止豈可不一當彼此互探遲速相待尅期而行法又曰貨則掠人則殺遼人吾人也遼貨吾貨也可以盡其殺掠乎爲敵用者可否則禁之庶分別各當其宜

第七十答

車入敵境敵情當未合而必先審也初以爲敵兵糧未必精多而實不然此不宜浪與之戰然避之又非出師之意當設奇以破其兵以耗其糧

第七十一答

車所駐之地環衛無虛地敵攻一面則引中權權勇以赴之他面不減法曰慮人窺其虛而率精兵襲其減損之地也乃敵愈益兵而我兵不多勢當張兩翼以抄其後散遊擊於四面揚塵熾火使敵眩惑而潛出精兵以搗其巢敵前後失顧吾計可施

第七十二答

車臨敵忽有敵中叛將密持約要言在某處爲內應某
日時來投備言敵中消息及應我之計無論真僞此機
不可失也果真也如其言以施之勝果僞也反其言以
出之亦勝而辨其真僞之術當察其言觀其色要其質
動其心量彼離合之情用我恩威之術更有因間之計
使彼弄假成真而反爲我用者要在臨機制變神乎其
神

第七十三答

車臨敵忽有自敵跳身來歸者備言敵已如何備我我

當如何備敵信之則恐爲間不信又恐失機當先惕以威後示以惠復醉以酒假敵之繼爲投我者探以密而揭其微真則無論已僞則拘其人造浮言使敵疑其順我恨不得而食之又言敵已殺其妻子使其歸路遽絕彼必爲我用而盡吐其實

第七十四答

出奇專在騎步今以車用有似遲鈍我如用諸奇法當選精健之馬用輕廂車載步兵雜騎兵遲速可以相並不勞照顧諸法可因地而施

第七十五答

車利生地惡死地而士卒顧家地卽生亦死今舉世怕
進取而我矯衆以居死地卻所行皆生法在結衆心鼓
衆氣齊衆力使之可靜可動可勞可佚自無地不可以
生

第七十六答

車偪險地天地震動風雨交集山川不辨以至旂不見
砲不聞火不可舉當此倉猝我當堅陣使師徒不驚別
有探報庶不致誤此時當急據險地要隘嚴飭諸將用
口號以資軍令車騎步輜各自爲守互相爲應有警則
據險之兵飛騎以報中軍仍爲固守勿動或相機潛出

奇兵制勝如班定遠因風雨以七十二人襲敵營者更奇

第七十七答

車營與敵遇而所駐之地廻渠迂澗深峽隘口草木蒙密高下相乘車行不便此正用奇因地性制勝之時當選精騎健卒或據隘以防敵或伏險以邀敵或旁出以襲敵因地制宜奇出不盡運用存乎一心

第七十八答

蜀丞相綸巾羽扇羊叔子緩帶輕裘好整以暇誠古之善用兵者也我誠能布置得宜不多不少應各有紀或

騎或步猝用矢砲騎出追而步割級亦安有不可者戰
守各半酌取其中自不慮營之虛也

第七十九答

列營結陣旌旗爲目金鼓爲耳動有變靜有方隨五行
爲運轉是古所稱天將者此兵法之常也如以變用正
以神用奇此又爲法之變者變殆異於常仍不出於常
第八十答

用兵必因乎地之順逆矣然有順地而逆用之逆地而
順用之又能不擇險易安而後動卽蹈死地而能生卽
致亡地而能存此必先料敵將之智愚出其不意以變

通而用者法不可拘以常也

第八十一答

車之布置似强者不得先弱者不得後然古有強將猛將貳者以如是之勇若拘於車將何以展其才也任用二將既素信其才慮智勇氣概果可覆敵卽揀精兵用輕車俾領之以便其用而復以軍繼後可建奇功

第八十二答

車中之騎步自有奇正敵來則拒而拒之中奇乃迭出或後擊或夾擊而引敵及車矢砲及之拒亦能致也或佯敗以引敵來或委物以招敵至抑激其怒使之不得

不來且攝其吭俾之不能不至法曰兵貴致人車豈祇拒人而不致人

第八十三答

李靖選善騎射者二千飲食舍止如突厥與之遇伺便擊之無不捷誠效其法而用之於派定車營照管分數內揀精騎二千假敵之飲食舍其乘隙而擊之功不出李唐下也而移借之法於騎隊中抽其十之一亦不至有虛之弊

第八十四答

一營之中騎步尙虞不相爲用而六營各分豈易比聯

也此必有牽制聯絡之法使之相依若唇齒唇亡則齒寒利害相關死生相倚一營如此六營亦然不聯而自無不聯矣尹紹祖未能比聯其圖營受拓拔英之擊也固宜

第八十五答

孔明以斜谷路狹裁八陣爲六陣未必然其時必約隊也今車行狹路或左爲前之後或右爲後之前或左右悉置之後臨時自可變通

第八十六答

車之初爲方營而圓曲直銳任所變每陣五變而得二

十五平時常教之或以爲花陣也臨時相視地形而花陣無所用然當圓而圓當曲而曲當直銳而直銳其機正不出乎花陣之中也法死而用活得其實效者在相機而行

第八十七答

車營之制要簡易直捷今驅車策馬又互相照顧法似煩亂然紀律旣明一呼立應捷如風雨

第八十八答

昔魏堅壁不踴而袁紹爲高檣起土山射營中魏爲霹靂車發石擊之其樓檣皆破然則矢石可下及亦可仰

攻我營四面各有砲車或設機而俯仰其砲用自如神
第八十九答

車近敵城其三面各有重城以居我叛將及遼人之爲
生計者而敵之親兵在城內其西外一面臨代子河不
住一人城中水乏開小便門取水於河我兵東向阻河
不得近城過河則又逼城下而後背水計當沿河列兵
假設過河之勢以防敵之刼而陰遣精兵相機以攻其
三面募死士託爲叛將復歸者持約要故驚怖以委敵
而遁使敵與叛將疑惑不安我因乘隙以攻之否則用
秦人置毒上流之法使取水者各受其毒不數日而敵

自憊然後用吾謀

第九十答

吳漢克廣都遂抵城都與劉尚隔江南北二十里爲營而幾爲敵乘我軍抵海蓋便當乘勝薄敵而各路未集此當量敵之多少而趨乘其危不然卽以吳漢爲前車也可

第九十一答

車行不無可乘之危而將離士卒而怖心生士輕主將而歸志切此更爲危之大者我當隨時設備或守或戰或遲或速或正或奇將卒相親甘苦與共如舊使指雖

歷諸危敵不得而乘

第九十二答

天久連雨馬陷車止時不燥而地若下敵起而不得逐其跡矣當連營固守據要害使敵不得來衝而秣馬犒軍俟雨歇卽計進取庶可以合天時得地利而協人和

第九十三答

其衆可合而不可離可用而不可疲與之安與之危此非有聯比之法不能如古大禹之賞戮成湯之威愛周武之勗戮以及名將相如諸葛之八陣李靖之六花精忠之五訣得其一俱可爲師

第九十四答

凡戰非陣之難使人人各能布陣爲難又云非知之難行爲難今之諸將或有布而不知知而不能行者願以陣法授以方畧使熟而習之臨時運用其妙無窮

第九十五答

車之馬羸牛駝號爲五萬其秣飼之需當因於地而敵似習耨地之法如元昊所以誘契丹王君嬺所以破吐番者當計我所載秣飼可敷幾日之用又探四旁之燒有未及者行採青法以濟之用亦不至或竭如預防其患卽先遣遊人熟視敵之來路於其地之四面先行此

法使敵之秣飼無所需而其計自可以阻也如此敵不能制我我更可以制敵

第九十六答

將智而嚴乃能用士士愚而忠乃能死戰凡設伏暗劫詐誘皆用士料敵詐偽情實皆在將此其中有術焉必合衆人之智以爲智作一己之忠以爲忠夫而後將可智而嚴士可愚而忠

第九十七答

車有火器種種如扞武車營儘可禦敵而殺敵然古人火牛火雞要在駭亂其軍我乃隨其亂而擊之夫乘亂

之兵當選強卒健馬以猛將率之進如風雨擊若雷霆
乘其亂而擊之敵必大敗我軍可以有爲

第九十八答

車薄敵巢勢必渡其臨城之河敵以精銳據河負城以
拒我又或令羸兵弱馬背城爲陣以誘我我如渡水交
兵而敵卻有精騎伏於城側待我半渡邀擊我議從南
北可渡處間道以攻而敵俱有防此當用破散之法大
集我兵於一處勢欲出攻於此而潛引精兵二千出其
不意以攻其所不備使其誘防之計俱不得而行

第九十九答

車營自有奇正然止供一營之用卽策應他營亦當如是也如大兵自西來而南與東卻有奇兵所謂裹毡踰嶺用寡用奇此當不在車營之中而東南兩鎮不足恃應必於諸將中選沉雄有智畧者爲之如李愬自文城馳二百里而擒蔡鄧艾自陰平攀緣木磴以降蜀者而後可

第一百答

蘇定方兩破突厥一乘霧一凌雪皆掩敵不備而破其牙帳楚之備吳也雨十日夜吳至見楚有備而還楚乃乘其還而破之然則兵用奇必因雨霧風雪也而奇之

出也或用輕偏廂快馬以疾馳或用精練騎步以潛入相地而行無有不勝

第一百答

攻有三道曰正曰奇曰伏昔李愬雪夜入蔡州此奇道也鄧艾裹毡出陰平此伏道也車如用奇伏不出輕車迅馬勁卒三者之外而臨機制變如擊鵠以亂軍吹簫以離士假敵衣帽以詐禱神靈種種出人意外者非領以智勇之將不能

第一百二答

法曰攻其所不備又曰攻其所必救今敵止一巢其備

甚具无歸路可截无糧草可斷古法似有不行然一城之守亦有所不備亦有所必救法又在聲東擊西避實擊虛二者而盡

第百三答

車抵敵境直薄其城而敵果築舊遼城伏精銳以冲我左而又出我不意卽廟山口於耀州亦可虞也此必用短髮遼人探其確實盛兵以截於要路吾然後盡力攻城而無他顧

第百四答

車之用專爲攻戰而一發輒則兎酋原自恭順其衆亦

可用也虎酋近日爲恭亦无或虞然其部落甚衆如拙
歹固桀驁也抄宰與敵爲連卽近方搖尾亦不可信一
有蠢動盡足爲防法曰以敵攻敵是當籠絡二酋使其
牽制拙歹抄宰諸部而不能發我復結之以恩要之以
信而又用遼之去敵投我者假敵衣裝暗擄其牲畜而
我明截以歸之如此則可以免其騷動而我能有爲

第百五答

車行糧從海蓋之背俱可以舟運而所攜之糧無幾大
兵一登岸或遼人之歸附或西虜之攜從其食俱在所
攜之外而日後更需糧甚多豈今之津通可供也當以

遼人之壯者充兵其老弱安插關門屯田各爲生計至西虜則聽其貿易撫虜請帑分別以犒其軍而鹽筴之利日增屯田所積日厚是固有可以充接津運者餉需豈有或乏之虞

第百六答

車營之法戰守各半敵小則一衝領一面之兵出戰而一面之中自爲兩翼步戰則騎爲奇伏騎戰則步爲奇伏敵大則四衝領四面之兵出戰步戰亦騎爲奇伏騎戰亦步爲奇伏而以中權督之鎗用連環砲用疊陣更出迭入循環無端故一營之馬步矢砲無一不可爲用

而守戰俱得其宜

第七百答

車之全得力在後勁而車一營之得力在中權如五陣之變始於方而藏之則爲方爲圓握奇在中權舒之則爲曲爲直爲銳握奇在陣後此又一營之後勁也蓋陣方陣圓則藏中權於內而爲勁陣曲則參伍錯綜舒中權於後以爲勁陣直陣銳或豎或前小而後大亦舒中權於後以爲勁陣無定而勁則有定此一營之後勁也推而極之或一衝以及一隊之細凡後出而應敵者皆謂之後勁而後勁之分別益明

第百八答

車營進而得勝有小營有大營深入千里戰非一合砲擊退敵或騎或步出營追殺而敵或佯敗或旣敗而糾衆來援其來之速以追殺之兵應之而以後軍相繼其來之遲以後軍應之而以追殺之兵相繼各營俱有哨探小歸小營大歸大營紛紛紘紘鬪亂而法不亂制勝之畧端在好整以暇

車營百八答卷下終

車陣圖叩答合編跋

甲辰夏需次保陽卽知有高陽孫文正公車陣圖百八叩並聞有百八答亟求之不可得見後十餘歲百八叩始有鐫本閱之喜不自勝而終以未見百八答爲憾戊辰春同鄉景熙郭君因差便輾轉搜尋始得自文正公裔孫茂才某急以示余展卷玩誦見其籌畫精詳議論奇確一時幕府多材洵爲古今所未有嗟乎文正公之忠貞大節昭垂史冊毋庸贅卽此車陣圖之制作精深茅鹿諸公之韜鈴曉暢今得合梓以傳豈非千古盛業哉觀公敘文與其僚佐每切切然以漢之武侯唐之晉

車營叩答合編跋

一

公相敦勉嗚呼無不及矣因不揣固陋聊附數語於後以誌景仰之私云

同治七年歲次著雍執徐涂月穀旦覃懷後學段福廣跋

車營叩答合編跋

戊辰春景熙得孫高陽車陣百八答於其裔孫喜而示

福

曰延平之劍失久必合子其爲我校之將并刊焉蓋

問之不與答合二百年於茲矣

福

嘗歎黃帝握奇武鄉

八陣詮解者言人人殊罔識聖賢創造之意今問答兩
存庶與姬姜唐李之問答並垂不朽乎雖然法迹也兵
心也想文正與其叅佐對踞畫沙成此巨製與冉氏兄
弟之規畫釣魚城何異岳武穆之言曰運用之妙存乎
一心建牙吹角者勿徒泥其迹而仿之致取譏爲鷓鴣
車則文正之幸抑

國家之幸耳隆慮劉福齡跋

先忠節著作如四書說約文集無欲齋詩皆有藏板認真草十五種雖無藏板猶有藏本惟百八答一書則第聞之而未之見也良由當日軍機謹密繕本無多一經劫灰片羽吉光渺難獲睹高曾以來訪求幾徧天下迄以不得爲憾戊辰春郭景熙大令奉差到定詢及是書亦復相與悵悵郭公旋赴高陽不意竟得之文正後裔而孫生亦甫得諸孔氏夫以二百年失傳之書一旦復見於世卒與百八叩合成完璧豈偶然哉而吾家歷代求之未得者今可壽諸梨棗與說約諸書併藏之矣尤吾家之深幸也郭公先謀付梓以公於世命校亥豕恭

車營百人答

跋

書數語以誌幸並感謝郭公購求之力云

定興鹿忠節公八世孫欣理謹識

車營百八答跋後

炳不敏而從戎有志讀先人書力不逮焉舊作有蕉
窗十則曰練兵籌餉御將安民鷹逐狐疑分攻合擊正
本清源稿成拍掌自笑曰古之運籌決勝者無乃亦若
是歟時壬子八月中庭月白露澈雲衢仰見秋色澄清
朗人懷抱俄而儼若有思莫知所向恍忽見有排闥而
入者衣冠樸潔舉止雍容袖出車營百八叩口授指畫
意絮絮不少休炳俯首悚聽覺關門二百里外之形勝
旌旗煥彩壁壘重新不啻置身於戎馬間也言畢拂衣
而出復回顧曰文正公措拄乾坤功高天下識此即可

想見一斑炳謹應之曰唯唯適門外有呼茅先生遂去

少頃聞隔壁有朗誦聲審諦之蓋旭日東升同塾讀歐陽秋聲者方知向者爲夢心竊異之迺急取百八叩條分纓析援筆誌之事誠奇矣亦未敢遽以爲真也去歲秋闈赴都偶遇孔氏於正陽門外導至寓所室廬精潔湘簾棊几雅雋非常又有別室書盈四壁內有督師紀略併車營百八叩知爲先文正遺書道及當年情事因念百八答胡以不傳是誠遺憾孔慨然曰是書君固未見耶卽啓篋取一帙付炳視之定興鹿忠節歸安茅忻州杜三先生百八答而先文正所編次者也甫閱

數頁頓憶前夢語似相符亟請借鈔藏之宗社繕畢賫
厚幣往酬之至則閨寂無人移居已久矣於戲茅鹿諸
公參僚關外雄才大略震鐸古今而百八答一書埋沒
二百餘年忽傳之於夢又得之於孔豈以炳懷想先人
精神所結而恍忽遇之耶抑以孔氏多藏先哲秘書而
資以取信耶其果夢耶其果真耶抑眞卽夢夢卽眞耶
何再訪孔氏而不遇倏來倏去竟若與茅先生同耶因
念經留壁中書遺圯上凡神物之有呵護者大率類此
鬱久必發數極則通豈非有關於天時人事哉炳擬付
梓而紉於力謹誌顛末以俟賢者同治戊辰四月高陽

龍溪白八名題跋

孫文正公十世孫 炳文 謹識

車營叩答合編跋

憶自髫髻讀書 先大夫嘗語曰昔 忠節公贊高陽

幕有百八答一書失傳已久累世求之不可得惟聞

先人口授三四則云某問某答而已 尊敬識之及長讀

百八師心佩之而不解其義每以不見答爲憾戊辰春

郭景熙大令到定興見訪談及是書輒相歎惋謂廣陵

散果不復在人間耶越月得郭公書云已獲百八答於

文正公家蓋轉購之孔氏者郭公純學偉略氣概不凡

誠天假之緣以發此奇蘊因與劉夏段傅諸君子議付

剞劂以廣其傳時 尊叔父名欣理從戎過省僅得一見

會以教習羈絆京師未克相與探討今歲初夏來會垣遂得與諸大君子細加校閱旋復訪於文正公十世孫炳文茂才取其抄本詳辨舛謬得讀跋後一篇其遇甚奇始知郭公所得於桂枝茂才者卽由是轉抄者也因更索其舊本百八叩蒐檢遺漏內有五公山人暨高陽令陳公兩序皆能洞徹源委開悟後學又有後勁圖一幅熟視之乃恍然於先忠節之前鋒後勁說所謂得力在後勁者殆卽此歟爰亟商於諸君子同補刊焉書既成囑尊跋而誌之尊年少未嘗學問曷敢贅一辭惟每讀忠節遺集恒於兵事未能燎然在目今獲是編

向之昧者以明而憾可釋矣夫二百餘年不傳之秘笈
一旦幽光闡發炳若日星脫非郭公好古敏求精心採
訪始終不怠其不至於湮沒不彰者幾希延平劍合趙
氏璧完未足以喻此快微獨孫鹿兩氏子孫之幸亦海
內運韜鈴建旗鼓者之一大助云

同治八年四月上澣定興鹿忠節公九世孫學尊薰沐
謹識